

劉襄勤公奏稿

劉襄勤公（毅齋）奏稿

劉錦棠著

劉公

襄奏

勤稿

劉襄勤公奏稿卷十一

起光緒十二年
六月訖十一月

目錄

地方瘠苦擬請酌加公費摺

聲復道員袁圭齡保案並請 准補缺片

請將新疆南路各官初任交代寬免起限片

恭報十二年正月分糧價得雪情形摺

代奏回王展緩期滿呈懇按班朝 覲摺

恭報啟用關防日期並請繳回 欽差大臣關防摺

新疆需才治理照章揀員畱省摺

估修吐魯番廳綏來縣兩城需用數目立案片

棟員署理塔爾巴哈臺參贊大臣員缺摺

發給伊犁營勇存餉逐款陳明請 飭核銷摺

請將潘效蘇補和闐直隸州知州員缺摺

魁福交卸回京片

訊明不法鄉約正法片

擬將義塾學童另行酌獎備取僧生摺

新疆新設佐雜並添設正佐各官請 飭鑄印頒發

摺

阜康縣需用祭祀山神祭品由司庫支發片

鎮迪二屬歲科兩考改歸撫臣辦理摺

登覆七八兩年關外報銷部駁摺

臚陳已故大臣賢勞事實懇 宣付史館摺

請 卹張恩濬等片

烏魯木齊四次查明陣亡殉難官紳兵民請 卹摺

新疆人命重案懇暫 准變通辦理摺

恭繳 欽差大臣關防摺

庫爾喀喇烏蘇同知請添設照磨兼司獄員缺摺

新疆應設撫標及城守等營員缺擬辦情形摺

查明新疆用款無可刪減存儲報部摺

新疆 大計鉅典懇緩至下屆辦理摺

地方瘠苦擬請酌加公費摺

六月初二日

奏爲新疆地方異常瘠苦擬仿照內地加增養廉之例於各官例定養廉公費外酌加公費以資辦公而示體恤恭摺仰祈

聖鑒事竊

臣

前奏請升迪化直隸州爲府增設知府以下

等官及藩臬兩司首領官經部議核准並議定每歲應支俸銀及養廉公費銀兩令於新疆征收地糧銀內動支仍照光緒十年奏准成案除扣六分減平外毋庸減成等因於光緒十二年二月初八日具奏奉

旨依議欽此欽遵咨行在案查

臣

前奏請將鎮迪一道兼

按察使銜管理通省刑名驛傳經部議核准尙未議定養廉公費該道例定每年養廉銀三千兩辦公銀七百兩現既兼管通省刑名驛傳公事較前倍增擬請每年除照例支給按察使俸銀外加給公費銀二千兩毋庸另給按察使養廉此外各官向有養廉公費卽此次省會添設各官亦經部議比照向章支給養廉公費本可毋庸更議惟新疆地處極邊商賈罕到日用之艱難百物之昂貴較之內地何止倍蓰各員竭蹶從公實屬入不敷出臣前奏請加給各官津貼銀兩部議以爲多立名目轉涉紛歧不如酌將俸廉公費概照十成發給等因於光緒九年十二月二

十五日覆

奏奉

旨允准欽遵在案查養廉一項自甘肅軍興以來已經督
臣奏明關內外一體發給實銀惟公費俸銀仍照章七成
折減現經部議准發十成以每員例定公費銀七百兩計
之每歲所增二百餘兩在內地宜無不足而新疆地方既
屬異常瘠苦核其所入仍有不敷使各員以自顧弗遑之
故而至因此誤公亦非

朝廷所以綏靖邊疆之意也伏查甘肅皋蘭一縣及東西
大路各繁缺州縣向來均有加增養廉之例公費亦較他

屬爲多擬請仿照辦理於例定養廉公費外酌加公費庶
名目不至紛歧而公事可收實效南路兩道除各舊有公
費銀每歲請各加銀一千兩新設迪化府及迪化縣除各
例定公費銀每歲請各加銀八百兩鎮西哈密喀喇沙爾
瑪喇巴什阜康昌吉拜城七廳縣除各舊有公費每歲請
各加銀六百兩迪化州學正向有准支公費銀八十兩現
請改爲府教授經部議照鎮西府教授例歲給公費銀六
十兩除此項例定公費外每歲請加銀一百二十兩鎮西
廳訓導除例定公費外每歲請加銀一百兩其餘雜職新
疆向無公費惟該員等均均以末秩遠塞從公擬請仿照正

印人員一體酌給公費布政司經歷一員庫大使一員每歲請各給公費銀一百六十兩道庫大使兼按察司司獄一員迪化府經歷一員鎮西廳照磨一員迪化阜康昌吉縣典史三員哈密廳巡檢一員每歲請各給公費銀一百二十兩以上歲共加銀一萬一千一百八十兩均請遵照部章概以十成實銀發給仍請在於新疆征收地糧銀內動支分年彙總報部據藩司魏光燾詳請具

奏前來臣覆加查核自兼臬司以下均係擇其員缺尤爲瘠苦酌量請加非此實無以辦公合無仰懇

天恩俯念新疆各該員缺實屬異常瘠苦

飭部核准於例定養廉公費外照數酌加公費以資辦公而示體恤出自

逾格鴻施是否有當謹會同陝甘總督

臣

譚鍾麟恭摺具

陳伏乞

皇太后

皇上聖鑒訓示施行謹

奏

軍機大臣奉

旨該部議奏欽此

聲復道員袁珪齡保案並請 准補缺片

六月初二日

再臣前奏遵照新章請以二品頂戴鹽運使銜浙江儘先題奏道那爾琿巴圖魯袁珪齡補授阿克蘇兵備道員缺奉

旨吏部議奏欽此經部議稱該員保二品頂戴畱原省儘先題奏道之案查光緒四年二月十二日左宗棠等奏克復南路西四城回疆一律肅清案內並無袁珪齡之名是否另案保獎係在何處出力於何年月日奉

旨應令將該員保案聲覆具奏再行核辦等因於光緒十二年二月二十四日具奏奉

旨依議欽此欽遵咨行到臣查該員袁珪齡於勦辦陝回金山股逆及兩次勦辦安集延布魯特賊匪尤爲出力員弁隨摺開單請獎案內經左宗棠奏保單開花翎鹽運使銜浙江補用知府擬保二品頂戴畱原省儘先題奏道袁珪齡請

賞給清字勇號並請

賞給二品封典等因於光緒五年十月初一日具奏並附奏此案請獎各員有於前次克復西四城南疆肅清案內已經擬保官階者均於單內聲明作爲各員底銜加保懇恩飭部一併註冊臣於克復西四城南疆肅清案內卽便

查照開除不致重複等因奉

旨著照所請該部知道欽此旋奉是年十月十四日

上諭擬保二品頂戴畱原省儘先題奏道袁珪齡著賞給
那爾琿巴圖魯名號並賞給二品封典欽此均准部覆行
知在案臣維克復南路西四城在事出力各員隨摺請獎
在勦辦安集延各匪之前而彙案請獎在勦辦安集延各
匪隨摺保獎之後凡於勦辦安集延各匪隨摺保獎之員
其克復南路西四城彙保案內悉皆查照開除該員袁珪
齡於克復南路西四城回疆一律肅清彙保案內擬保官
階實已於勦辦安集延等匪隨摺保獎案內經左宗棠奏

明作爲底銜奉

旨允准欽遵有案該員從役有年深資得力於邊地情形尤爲熟悉合無仰懇

天恩飭部核准以該員袁珪齡補授阿克蘇兵備道員缺於地方實有裨益茲奉前因相應聲覆謹會同陝甘總督臣譚鍾麟附片具陳伏乞

聖鑒訓示謹

奏

軍機大臣奉

旨吏部知道欽此

請將新疆南路各官初任交代寬免起限片

六月初二日

再據藩司魏光燾詳稱查定例各廳州縣經手倉庫錢糧交卸後限兩箇月移交後任接收結報歷經遵辦在案惟查新疆初設行省除北路各屬交代尙承甘肅向例照舊辦理外南路各廳州縣皆屬新設交代係屬創案從前設局辦理善後收款無論採買征糧支款無論軍需善後概係統收統支遇有交卸造報款目紛歧與例定交代情形迥別現經該司分別釐定截至未設郡縣以前所有善後征糧各局收支動存銀糧概行提出飭令造冊報由糧臺核辦其自設官到任日起分別軍需善後例支爲三大宗